

中西紀事卷之七

閩浙再犯

江上蹇安



道光二十一年七月英夷將犯浙以舟師取道過閩洋遂
襲廈門陷之廈門當福建泉州之海口興泉永道治焉時
顏伯燾任閩浙總督因粵東之役奏請移節入廈門增兵
戍守撫事既成接據泉州及興化各澳洋面探報夷船游
奕停泊或三四艘或八九艘無虛日方督修船礮預備出
洋攻擊

見粵東夷務
附片奏中

而英舟大幫已泊廈門外之鼓浪嶼

口當上年之犯廈也爲鄧制使新募之水勇所敗至是欲

修前怨故聲言犯浙將以乘閩中之不備而攻之是月初
九日英人駛駕火輪兵船入港制使調集水陸各兵禦于
嶼口開礮擊沈其火輪船一兵船五俄而英舟直撲口內
礮臺舍舟登岸先犯陸軍陸軍潰金門鎮總兵江繼芸搶
護礮臺不及被夷礮轟擊落水死延平副將凌志署淮口
都司王世俊皆力戰殉焉是時我水師瞭西洋船大幫連
檣內進皆游涌而逸興泉永道劉耀椿及廈門同知顧敦
忠皆先後走廈門遂陷制使收集潰兵退守同安英人方
謀還志于浙踞廈未久卽全數駛出鼓浪嶼

據謝蘭生思
忠錄所記夷

人在廈門肆掠有鄉民陳氏與之接仗夷眾五千我兵五
百夷用車礮民用抬槍以一擊十夷兵死者以百計傷者

以千計陳氏之死者三人傷者十二人耳是以不敢久駐
廈門而退屯鼓浪嶼也蓋英夷本欲犯浙又方受大傷是
以全數退出八月制使督兵至廈門海口肅清商民復業遂以
收復奏聞竝自請嚴議奉

上諭逆夷沿海滋擾廈門尤其垂涎之地該督駐扎半年
之久不能先事預防以致倉卒失事本屬咎無可追姑念
夷人豕突而來弁兵奮力抵拒沈擊夷船六隻此時業已
收回著從寬免其治罪仍交部嚴加議處欽此興泉永道
劉耀椿係專防廈門大員因失守之後轉赴大營隨同大
兵入廈收復制使以其功過相抵奏請革職留任

上賞其罪亦許之是役也制使非無先事之備而爲粵東

撫事所誤遽將所募之水勇八千漫然散遣未暇擇其精銳撥補水師以及于敗然當其陳奏夷務力排撫局憤懣填膺方自任專闔討賊之權以作天下同仇之氣初不意甫攫其鋒而固已情見勢屈暮氣乘之是則才弱賊强者也

上亦知受降非策擇將爲難故于諸臣之功罪是非不欲顯爲別白而制使以喪師辱國悒悒告歸踰年和議成而廈門竟不返矣

八月英夷再犯浙之定海當義律之繳還定海也伊相在浙接奉粵東咨會遣員收復奏聞奉

上諭伊里布不遵諭旨惟知順從琦善屢次奏報始以兵礮未集藉詞緩攻繼以接得繳還定海之札卽信以爲真已有旨令其折回本任命裕謙馳赴浙江作爲欽差大臣會同提督余步雲迅速勦辦欽此方制使接署兩江總督聞伊相在浙逗留不敢進兵心弗善也至是以欽差專任浙事上書主勦竝以義律心懷叵測繳還定海之說恐售其欺請飭壽春鎮標官兵仍行前進奉

上諭所奏極是逆夷攻踞定海之後姦淫搶掠荼毒生靈凡我士民志切同仇人思敵愾裕謙此次赴浙以順討逆以主逐客以眾擊寡必當一鼓作氣聚而殲旃朕伫望該

大臣迅奏膚功懋膺上賞欽此維時定海鎮海等處尙有
洋船四出游奕制帥遣兵節次焚勦並誅其官船之夷目
一人初英將踞定海虐使定民用法嚴酷殺人者先以刀
割裂其皮納入水銀周身灌注遂活剝而懸焉制帥旣獲
其酋令如其法誅之又夷人之死于定海者令軍民掘其
尸而焚之通衢事浸聞于粵粵東撫事方定乃起報復之
謠以圖犯浙然是時夷船方退出虎門靖逆將軍痛勦乞
撫之奏至

上見夷情恭順方飭制帥將寶山鎮海等處調防之官兵
體察情形酌量裁撤而制帥接得粵中咨會以英夷在粵

聲言將移兵入浙報剝皮掘尸之恨現傳聞有新到之兵
船人船一俟齊備卽赴浙江咨飭嚴防等因前來時值南
風司令正海洋潮汐旺盛之時制帥方次嘉興乃奏請于
六月二十九日統領前此奏帶來浙之江甯駐防八旗勁
旅並徐州鎮標精兵五百名由嘉興起行前赴鎮海會同
提臣余步雲撫臣劉韻珂體察情形相機籌辦又言該夷
以通商爲命而通商有一定馬頭奕山等旣爲籲懇

天恩自當籌及全局與之要約堅定爲一勞永逸之計斷
無僅令其退出虎門仍復滋擾他省之理現旣聞有赴浙
之謠何以不向該夷詰問明白轉行咨飭嚴防以致沿海

各省謠傳不一風謠日甚不但各省調防之官兵未便請
撤卽居民人等亦皆同仇敵愾舍其本業而荷戈以待實
于

國計民生兩有關繫應請

旨飭下靖逆將軍奕山等向該逆嚴行詰問究竟是否誠
心乞撫抑仍是得步進步之故智使各省有所遵循臣不
勝翹悚待

命之至其時英人赴浙之謠雖傳播粵中而靖逆以撫事
方定諱不上聞遂復奉

廷寄謂該夷赴浙滋擾旣屬風聞從何究其來歷且果別

有思逞斷無先將傳播逗漏之理著裕謙仍遵前旨將江浙調防官兵酌量裁撤不必爲浮言所惑以致糜餉勞師等因由六百里諭知詎制帥甫抵鎮海而廈門告陷之疾置已聞于是飛檄定海總兵葛雲飛會同處州鎮總兵鄭國鴻安徽壽春鎮總兵王錫朋統各鎮兵五千前赴定海扼其內犯之路英夷果于是月十二日濮鼎查部士利等統帶大小火輪兵船二十九艘再犯定海初以四舟駛進竹山門被葛雲飛等開礮轟擊斷其頭船大桅旋即竄去十四日英兵由竹山嘴登岸鄭國鴻等督兵抵禦殺傷相當會連日陰雨轉戰泥淖中援兵不至士卒漸疲十七日

英人分三路進攻以小舟渡兵登山撤舟死戰首陷曉峯
嶺王錫朋中鎗死壽春鎮一營遂潰焉有頃竹山門潰鄭
國鴻死之時葛雲飛守近城以扼道頭街之市埠孤軍巷
戰被敵人揮刀削其半面猶持矛手殺數人植立于崖石
閒而斃是役也三鎮血戰七晝夜連以扛銃扛礮前後殲
夷兵千餘又擒其二帥斬之傳言二帥者漢鼎查安突德也浙撫謂漢鼎查已死卽指
是役惟定海無險可守所憑者不過三面之山寇踰山而入
勢遂不支兵不過五千備多而力分山高而守勞是其所
以敗也三鎮陣亡

上謂其以四千殘師當二萬巨寇惋惜久之均

飭部從優議卹惟署定海同知舒恭受者初以從三鎮殉
難奏請

賜卹在案其後逃避入省浙撫以鳧水遇救代爲開脫
請隨營効力與粵東之劉大忠先後同揆矣

英人旣破定海踞城數日統其得勝之舟師自蛟門島進
攻鎮海時制帥駐師城內分派甯波提督余步雲守招寶
山江蘇狼山鎮總兵謝朝恩守金雞山鎮海以笠山爲外
障以招寶山爲內屏山之上有利威遠城前明所築以禦倭
寇者制帥以余步雲爲宿將故以當關之責任之而別遣
謝朝恩守金雞嶺與爲犄角初不意賊自山後來而提營

之先潰也初定海告急制帥自東門城上瞭見提軍所守之招寶山上懸挂白旂心竊訝之乃擇日誓師于關帝

天后之神與各營將士約毋得以退守爲詞離卻縣城一步亦毋得以保全民命爲詞收受夷人片紙如有不用命者明正典刑幽遭神殛刑牲醴酒示無轉念提軍微聞其事值誓師之日遂以腿疾辭不赴行禮制帥祭畢回營愀然不樂語其僚幕曰夷人戰則尙紅和則尙白予見提軍張白旂于山上故以誓師之舉覘其向背今其情可覩矣八月二十六日英夷舟泊鎮海制帥方援枹鼓厲士余步雲果詣城上請遣外委陳志剛赴夷船暫示羈縻制帥

不許有頃英人舍舟登岸攻招寶山旋于山之後面以小
舟載兵由石洞攀援而登官兵腹背受敵威遠城失守英
人復分兵攻金雞山亦繞出山後兩路夾攻總兵謝朝恩
拒戰不克被砲轟擊落水死兩山旣陷督營官兵望風自
潰維時制帥家人遙見賊自北門入制帥由東門奔赴學
宮趨前護視中途遇一弁踉蹌號泣呼曰元帥投泮池殉
難矣家人急至率潰勇覓水搶救以小轎扛護出城行至
餘姚而卒時提軍已不知去向甯紹臺道鹿澤長逃入慈
谿詭稱入城河殉難昏迷之際被兵勇曳救以小舟護送
入慈而鎮海之文武員弁皆棄城走惟縣丞李向陽死之

甯波去鎮海六十里忽聞提軍回署一郡大驚又探報有
外洋杉板船隻來至邵港探量水勢于是郡中自知府鄧
廷彩以下皆覓小舟奔上虞而提軍亦單騎自南門出居
民遷避一空二十九日英人以大小兵船八艘直泊郡城
靈橋門下連開大礮虛無人聲因率夷眾舍舟登岸城門
洞開遂不血刃而陷焉夷酋郭士利首先入城踞居府署
出示安民始稍稍有至者惟甬東大郡半月之間三城連
失而慈谿亦以寇氛逼近官民棄城不守浙撫聞變亟檄
飭前任福建臬司鄭祖琛督兵畫曹娥江而守防紹實防
省也裕帥之幕屬家人自餘姚舟次興尸前進九月初一

日自蕭山西興壩渡江浙撫劉韻珂迎入杭城始備棺衾殯于地藏庵越日歸其櫬于京師具其事以聞而諱言提臣擁兵不救之顛末厥後制帥之家人余升控于都察院奏聞

上飭逮余步雲入都寘之法裕帥死事旣雪奉

旨照陣亡例從優議卹

予謚靖節惟金雞嶺殉難之總兵謝朝恩求遺骸不得褒忠之典闕焉

四明之旣陷也浙撫告急于京師

上簡授奕經爲揚威將軍特依順文蔚爲參贊大臣又飭

調陝甘兵二千赴浙進勦將軍以是年冬月抵蘇館于滄
浪亭浙撫專任西路之防自江以東坐待大軍籌之帷幄
立功反掌時有以專閫太遠爲言者而蘇門夙稱繁華都
會供帳之隆聲色之悅將軍頗便之于是驛置偵探千里
待報又多寄耳目于蘇浙最久之州縣以密謀制勝外人
弗聞也時英人踞甯波又分兵守鎮海定海等處東至大
洋聲勢連絡浙撫畫江而守紹興東逼慈谿求援日急而
將軍以兵力太單抵蘇之後復遣人赴淮徐聞招募山東
江蘇義勇先後來營謀之三月未嘗一誓師而東有前任
安徽泗州知州張應雲者請以計取之謂夷船自入內地

以來率漢姦爲之嚮導故所過城邑如駕輕車而就熟路
然不過啗之以利非有恩義之結足以令其效死今四明
當水深火熱之時紳民靡不延頸望大兵早到而漢姦多
其鄉人誠得若輩傳將軍令以重賞招撫之使其皆爲我
用我兵攻城先期預伏城中內外相應此兵法所謂因間
也將軍參贊皆以爲然乃統兵自蘇起節行過杭州不少
留踰年悉眾渡江而多魚漏師之變起矣

二十二年正月大兵次紹興府時將軍參贊議同日分襲
甯波鎮海以牽制援應之賊知州張應雲先期與甯鎮紳
士約令投夷之漢姦分伏各處以爲大軍內應慈谿城邑